



*Ainsi que Iesus annonçoit la parole, vn Paralytique luy fut présenté ; auquel il pardonna ses pechez, & le guarit.*

**L**ESVS estoit arriué derechef en Capharnaüm, & estant en vne maison, grande multitude s'y assembla, en sorte que la place neles pouuoit comprendre : en ce lieu Iesus leur annonçoit la parole de Dieu, où plusieurs Scribes & Pharisiens de Galilée & Ierusalem estoient assis. Et voicy des hommes portans sur vn lit vn homme Paralytique ; mais ne pouuans approcher pour le mettre deuant Iesus, pour la multitude, ils monterent sur le toict, & l'ayans découuert, le deualerent avec le lit, & le poserent au milieu. Quand Iesus eut veu leur foy, il dist au Paralytique, Fils aye bon courage, tes pechez te sont pardonnez ; & aucuns des Scribes pensoient en leur cœur, Qui est certuy-cy qui blaspheme ? car nul ne peut pardonner les pechez sinon Dieu. Or Iesus connoissant leur pensée, leur dist : Lequel est plus facile de dire à ce Paralytique, Tes pechez te sont pardonnez, ou de dire, Leue toy, & prens ton lit, & chemine ? Lors Iesus leur montrant son autorité, dist au Paralytique, Leue-toy, prens ton lit, & t'en va en ta maison : ce qu'il fit. Dont furent tous estonnez, & glorifioient Dieu, & furent saisis de crainte, disans : Nous ne vismes iamais telles choses, nous auons veu aujourd'huy choses merueilleuses.

*S. Matthieu Chap. 9. S. Marc Chap. 2. S. Luc Chap. 5.*